

札

樸

札樸第七目錄

匡謬

小學

引經

柴

引取土

悔

重修說文

秀

亮

沙鳴

嘶

戴國

雉震响

妒媚

疏

蟄

萬物利

郇

筵

鏗

養之以福

左傳補注

逗撓

南陵沂水

潛水

音初

凌

窕

協洽

獠

霧

河墳

汝爲瀆

櫓

蘧淪

白芷

莞

萋葉白

荻蒿

牡

麋舌

佳其

狗

竊脂

滴

隋

鐸

癸

潛夫論

適

申池

項撮

連

駮駮

縈紆

貸

不內顧

寮

夔魑

藉田賦

百草含葩

熙春

鄆亭

翰

劉擔

骨母

滿

貢

水南曰陽

宋書

鐵戈斬山

巾車

彤天

散宜生

越鄂君

飾巾

暗噫

沙音蔡

駕

蝠蛇

肆

彼

蕩

李善引書

卉

砒

慘亮

謂

庸峭

僱工

慤素

究

虞猛獸

操弓

跼

陶遂

駮

梅

偕時

鐵鉄

鐵幕

獸

誅

牂牁

牖模

餽飮句豆

粟秒

采杞

笏

陽稍

藍衫

櫺星門

區

毛詩拾遺

集韻脫筠字

巾卷

胛

秦

唐

嶼

駁

蹠

稜梁

止術

裏節

挽

袞

觸龍言

齋速

府種

痕耗

女岬山

杜探

乖居

烏喙

楫柎

字母

掌技

癯衰

摻

羈

釋文引字林

魚泣津

襠

練

鵠騎

憂艱

區種

王姓

辟姓

口占

烘蘖

高檣

櫛

灘脩

騶鎬溜

鑿

札樸第七

曲阜 桂馥 未谷

匡謬

小學

古人於小學童而習之兩漢經師之訓詁相如子雲之
辭賦皆出於此今以小學經學辭章之學判爲三途經
學不辨名物辭章不識古字吾不知其可也然其弊不
自今始義疏起而訓詁廢議論開而辭章亾盡破古人
之藩籬者其在趙宋乎

引經

古人引經畧舉大義多非原文如朱書彭城王義康傳
引詩兄弟雖閭不廢親也引書九族既睦可以親百姓
說文引書洪水浩浩此豈詩書之本文哉今人多據書
傳所引以增改經文雖曰治經實亂經也可不慎乎

三國志注引易初六履霜陰始凝也說文引禮及左
傳九簡畧洪容齋引說文曰圉圉升雲半有半無以
爲尙書逸文更謬案曰圉乃洪範之文其下七字許
氏解說

柴

說文柴惡米也从米北聲周書有柴誓兵媚切玉篇柴

鄙冀切惡米也紫音祕說文曰惡米也又地名紫同上
廣韻紫惡米又魯東郊地名說文作紫紫上同馥案玉
篇廣韻所引說文皆宋人重修據徐鉉之本玉篇紫字
在粗下粒上與說文次第無異然則玉篇所據之說文
從非不從北猶輩本從非俗從北廣韻從北又因北致
譌也

引取土

說文捋引取也玉篇引作引聚也詩縣釋文云捋說文
云引取土馥案取土乃誤分聖字爲二說文聖土積也
禮運人情以爲田注云田人所捋治也疏云謂以手捋

聚馥謂釋文本作堅乃許氏原文玉篇改作聚詩揀之
隕隕箋云築牆者桴聚壤土盛之以藁而投諸版中

悔

洪範曰貞曰悔僖十五年左傳蠱之貞風也其悔山也
杜注內卦爲貞外卦爲悔正義云乾之上九稱亢龍有
悔從下而上物極則悔是外爲悔也馥案悔本作𨾏說
文𨾏易卦之上體也引書曰貞曰𨾏正義謂物極則悔
是直作悔字解矣易繫辭震无咎者存乎悔韓康伯以
爲悔過其誤與正義同晉語筮之得貞屯悔豫唐六典
內卦爲貞朝占用之外卦爲悔暮占用之此皆借悔字

康成鄭氏云悔之言晦也馥謂晦猶終也言上體終也

重修說文

元豐元年詔知禮院王子韶光祿丞陸佃同修定說文

今所傳小字本

在安邑朱傑淳家

李燾據以作韻譜者卽元豐

重修之書雍熙本娃讀若回口迴切李燾本回作回口

迴切案爾雅釋文娃字林口頰反顧口井烏攜二反王

陸改爲同迴者據字林口頰之音也案郭景純於爾雅

娃音悲於方言娃音口頰反乃知頰爲類之譌又因口

頰轉爲口井王陸不審輒易舊文又改耿炯省聲爲娃

省聲舛益甚矣

秀

漢諱秀說文無釋不知所從毛刻徐本篆作𠂔此誤也
當從𠂔木部杲從𠂔云與杲同意子部𠂔亦從𠂔三字
楷書皆變從乃今遂不知爲𠂔矣又禿下云上象禾粟
之形取其聲案禾粟與禿無意秀則禿矣後人因取其
聲三字遂改粟以就之不知秀禿聲相近當作象禾秀
之形

說文莠篆作𦰩皆因不知從𠂔故誤作𠂔又作𠂔

亮

說文諱事有不善言諱也隸變作亮魏志高柔傳昔仲

尼亮司馬牛之憂集韻謹就也韓詩室人交徧謹我案就乃涼之譌涼或作齧與就形近致誤

沙鳴

周禮烏麋色而沙鳴鬱廣韻沙所嫁切案老子終日號而嗌不嘖和之至也玉篇嘖聲破馥謂嘖沙音義同太元柔兒於號三日不嘖嘖當爲嘖老子俗本亦誤作嘖

嘶

玉篇嘶馬鳴也說文嘶悲聲嘶散聲馥案嘶俗作也南齊書蕭坦之語聲嘶時人號爲蕭瘧又張瓌傳宋孝武問太極殿前鍾聲嘶此二嘶字並當作嘶

魏書黃門侍郎山偉臨元順喪悲慟無已帝怪問黃門何爲聲散偉以狀對

戴國

隱十年春秋宋人蔡人衛人伐戴注云戴國今陳畱外黃縣東南有戴城釋文云伐戴音再字林作戴云故國在陳畱榘案釋文爲人所改當云伐戴音再字林作戠說文戠故國在陳畱字林當同

雉震响

夏小正正月雉震响傳云震也者鳴也响也者鼓其翼也案初學記兩引此文竝云雉者鳴也震者鼓其翼

妒媚

顏氏家訓太史公論英布云禍之興自愛姬生於妒媚
漢書外戚傳成結寵妾妒媚之誅二媚字竝作媚

疏

顏注急就篇紵織紵爲布及疏之屬也疏當爲練顏注
地理志紵織紵爲布及練也

蟄

釋名下濕曰隰隰蟄也蟄濕意也馥謂蟄當爲墊墊下
也下故濕

萬物利

六韜天之爲天遠矣地之爲地久矣萬物在其閒各自利馥案利當爲列說文地下云元氣初分輕清陽爲天重濁陰爲地萬物所陳列也

釋地郊外謂之牧釋文云李本牧作田字釋云田隰也謂隰列種穀之處

郇

漢書地理志右扶風栒邑縣應劭曰左氏傳曰畢原酆郇文之昭也郇侯賈伯伐晉是也臣瓚曰汲郡古文晉武公滅荀以賜大夫原氏黯是爲荀叔又云文公城荀然則荀當在晉之境內不得在扶風界也今河東有荀

城古荀國史記高祖功臣侯年表作恂索隱云縣名屬扶風音荀故文王封其子之邑河東亦有郇城元和志三水縣下云柤邑故城在縣東二十五里卽漢柤邑縣屬右扶風古郇國也左傳云畢原豐郇文之昭也馥案扶風自有柤邑縣與晉地之郇國遠不相涉諸家牽合爲一失之惟瓚說得實

粦

廣雅粦麴也粦爲粦之譌五音集韻粦煮麴也鄭注天官籩人云今河閒以北煮種麥賣之名曰逢案字本作體說文粦煮麥也讀若馮

鏗

樂記石聲磬磬以立辨史記樂書作石聲磬磬以立別
論語子擊磬于衛荷蕢曰鄙哉磬磬乎釋名磬磬也聲
堅磬磬然案說文磬磬一字磬謂器空皆非聲也當作
磬磬說文磬餘堅者與釋名聲堅義合

說文磬字訓疑有闕文

養之以福

成十三年左傳能者養之以福漢書律歷志養以之福
酸棗令劉熊碑養以之福惟德之隅宋書吳喜傳自昔
力安社稷功濟蒼生班劬引前笳鼓陪後不能保此者

歷代無數養之以福十分有一耳馥案宋書據杜本左傳與漢本異

漢書五行志能者養之以福當據律歷志改正

左傳補注

王石臞給諫曰惠松崖左傳補注引字林藐小兒笑也此本李善文選注毛晉所刻有脫謬一本云字林藐小也孩小兒笑也毛刻脫三字惠氏不檢遂沿其誤

逗撓

漢書韓安國傳逗撓當斬服虔曰逗音企應劭曰逗曲行避敵也馥謂逗撓當爲逗撓說文逗曲行也綺戟切

橈曲木

南陵沂水

漢書地理志京兆尹南陵沂水出藍田谷北至霸陵入
霸水霸水亦出藍田谷北入渭師古曰茲水秦穆公更
名以章霸功視子孫沂音先歷反馥案沂當爲沂正作
沂玉篇所大也充滿也秦穆公欲以章霸功之開拓充
盛故名沂水後世讀沂爲桑故切但主沂洄一義遂不
解先歷反爲何字矣師古曰茲水者師字衍文茲亦誤
字當云古曰產水漣作產猶瀋作養產茲形近致誤視
子孫下當有師古曰三字蓋先歷反乃顏所釋字音也

潛水

水經潛水出巴郡宕渠縣又南入於江酈注潛水蓋漢水枝分潛出故受其稱耳馥案出宕渠者說文作潛水經典借潛字書沱潛旣道漢志作潛又借沱字夏本紀沱沱已道是也酈注以爲潛水失之

音初

莊君述祖曰蔡中郎明堂月令論引樂記音初卽呂覽之意始意誤爲音也初卽始

凌

釋言凌慄也郭注凌慄戰慄釋文云案郭注意當作陵

埤蒼云凌慄也樊注作凌冰凍也馥案此多誤字以意求之郭意作悽埤蒼亦作悽樊注作凌凍當爲療說文無悽字正作凌樊注最善蓋療慄竝從ㄩ俗皆變從立心凌之爲悽亦猶是耳羽獵賦虎豹之凌遽字正作凌西京賦百禽悽遽又從立心馥謂悽爲憐之別體方言趙魏燕代之間謂哀曰悽玉篇悽憐也哀也慄也兼二義矣

窕

釋言窕肆也郭注輕窕者好放肆案說文窕深肆極也淮南兵畧訓谿肆無景高注肆極極谿之深不見景也

晉書羊祜傳深谷肆無景曹攄贈石荊州詩窈窕山道
深詩關雎箋云幽閒深宮靜女箋云猶貞女在窈窕之
處皆謂深肆也

協洽

釋天太歲在未曰協洽李巡云陽氣欲化萬物故曰協
洽協和洽合也馥案陽氣當爲陰氣高注淮南天文訓
云陰欲化萬物和合協洽

獠

宵田爲獠釋文云郭音遼夜獵也或作燎宵田也據此
則別本作燎詩伐檀正義引郭注云獠猶燎也今郭注

無此四字但云或曰卽今夜獵載鑪照也馥謂獠猶獠也四字當在或曰下

蜀都賦將饗獠者劉逵本作僚云僚獵也馥謂獠誤爲僚

霧

地氣發天不應曰霧霧謂之晦釋文云霧字林作霧本亦作霧馥案霧從目見說文至諸字書韻書並無從口之字蓋誤也玉篇日部有脊字云亂明字林當從日作霧

河墳

釋地墳莫大於河墳李巡云墳謂厓岸狀如墳墓名大防也詩汝墳傳云墳大防也箋以爲汝水之側淮濱傳云濱涯也箋以爲淮水大防正義謂墳從土濱從水故其義有別馥案說文圻大防也濱水厓也字異義同詩爾雅借墳爲圻李巡謂狀如墳墓臆說也詩正義謂從土從水義別淺說也

汝爲濱

釋水汝爲濱又云女有濱案說文涓下引作汝爲涓因有濱譌作濱

憶

釋木杻檇釋文杻女九反呂郭竝汝九反檇字又作億
說文云檇梓屬也詩隰有杻陸璣疏云杻檇也今官園
種之正名曰萬歲取名於億萬材可爲弓弩幹也馥案
說文檇杻也檇梓屬大者可爲棺槨小者可爲弓材是
檇檇二字同音不同物二陸竝誤又案說文杻古文作
杻則讀杻爲汝九反者亦誤

檇通作檇考工記弓人凡取幹之道柘爲上檇次之
鄭司農云檇讀爲億萬之億

薤薤

孫觀察星衍曰釋草其萌薤薤卽權輿釋詁權輿始也

大戴禮孟春百草權輿郭景純以蒹屬下非是馥案釋
草葭華蒹蘆莢葍其萌蘼蒹茅皇華榮說文蒹蒹
茅艸之皇榮也夢卽萌灌淪卽蘼蒹茅上不及蒹深服
觀察之說有徵

白芷

本草白芷一名莞一名苻離釋草莞苻離郭云西方人
呼蒲爲莞蒲江東謂之苻離用之爲席此與白芷遠不
相涉何以致此誤釋草芷夫王郭云芷草生海邊似莞
蘭越人采以爲席陳藏器云芷芷一名江蘼子馥謂芷
有江蘼之號與莞同類又皆可爲席遂混苻離江蘼爲

一江離白芷皆香草因誤傳白芷爲苻離與苻薤俱白
蒲又與白芷滑

莞說文作藎

莞

劉向九歎莞芎棄於澤州王逸注莞苻薤也馥謂莞乃
詩之芎蘭說文芎蘭莞也芎蘭芎藭皆野蔬美品故棄
之可惜

萋葉白

詩言刈其萋陸疏云其葉似艾白色余目驗其葉青色
背乃白色疏當云背白色疑轉寫脫謬本草綱目萋蒿

二月發苗葉似嫩艾正面青背白

荻蒿

戰國策趙策公宮之垣皆以荻蒿楷楚顏氏家訓常買荻尺寸折之然明夜讀陸璣詩疏蕭荻今人所謂荻蒿者是也莊子釋文蕭荻蒿也馥案荻當爲荻監本爾雅蕭荻釋文音秋唐石經作荻左傳伐雍門之荻是也

牡

釋草蔚牡蒿郭注無子者陸璣詩疏謂卽牡蒿八月爲角角似小豆角本草卽馬先蒿唐本注云實八月九月熟圖經云郭謂無子陸云有子二說小異又唐注本草

牡荊云莖勁作樹不爲蔓生故稱之爲牡非無實之謂也覆案牡荊牡茅皆非無實郭說未允

麋舌

落麋舌郭注春生葉有似於舌案釋鳥鵲麋鵲從昏音古滂切故司馬彪云亦呼鵲昏是也麋舌卽麋鵲草與鳥同名者郭以爲口舌音義兩失

佳其

釋鳥佳其鳩鵲釋文云佳如字旁或加鳥非也覆案說文騅或作隼佳旁加鳥乃正文何得爲非陸氏所謂如字者如隼字也旁或加鳥非也者隼旁加鳥作鵲也蓋

釋鳥原作隼其釋文原作隼如字寫者竝誤爲佳也又
鷹隼醜下釋文云隼本或作鷩案佳卽鳥也無勞更加
馥案此言隼上從佳卽鳥無勞更加鳥作鷩鷩卽所云
旁或加鳥非也

狗

釋獸熊虎醜其子狗左傳疏引李巡云熊虎之類其子
名狗郭注引律捕虎一購錢三千其狗半之集韻引漢
律捕虎購錢三百其狗半之狗熊虎子馥案列子釋文
說白豹云爾雅熊虎醜其子豹豹熊虎之子也是狗豹
皆豹之譌

竊脂

桑扈竊脂或謂喜竊脂膏案春夏秋冬四扈於五色得其四而無白脂卽白色所謂膚如凝脂是也竊脂淺白今謂之月白易林桃雀竊脂巢於小枝豈桃雀亦竊脂膏邪

澗

說文水中坻人所爲爲澗馥案爾雅水中可居者曰洲小洲曰渚小渚曰汜小汜曰坻人所爲爲澗此五句合爲一節釋文引郭圖水中自然可居者爲洲人亦於水中作洲而小不可止住者名澗水中地也說文郭圖皆

連上文爲義今爾雅五句各爲一節後人亂之也

階

說文階下云如渚者階丘水中高者也馥案渚字後人
妄改爾雅如階者階丘郭注水中小洲爲階子虛賦且
齊東渚鉅海李善引聲類階或作渚是李以渚海爲階
海說文渚下引爾雅小洲曰渚亦後人加之又泚下云
小渚曰泚泚下云小渚也爾雅竝作階

銖

玉篇銖與鈔同史記周本紀其罰百率注率卽銖也馥
案銖當爲鈔尙書呂刑銖字亦鈔之誤

𡙇

廣韻𡙇下引詩傳三女爲𡙇詩見此𡙇者釋文云字林作𡙇馥案說文𡙇字云三女爲𡙇然則字林亦作𡙇釋文廣韻兩𡙇字竝當改從說文

潛夫論

王符潛夫論引書使羞其行羞作循案此無義可尋蓋羞以聲誤爲脩又因脩循形近誤爲循耳

適

書康誥乃惟青災適爾賈傳治安策以是爲適然𡙇案適卽𡙇也玉篇𡙇飯堅柔調也今作適說文飯剛柔不

調相著讀若適馥謂不字誤當作才才調適調也廣韻作餅堅柔相著餅乃飯之誤

申池

文十八年左傳齊懿公游于申池杜注齊南城西門名申門齊城無池唯此門左右有池馥案爾雅十藪齊有海隅淮南云申池在海隅高誘注海隅藪史記集解引左思齊都賦注申池海濱齊藪也然則懿公所游之申池謂海隅藪杜以爲城池失之

項撮

莊子人間世支離疏者會撮指天注撮項椎也案字當

爲櫟玉篇櫟木錐也徂活切撮纂聲相近尸子行險以撮撮乘載器音與鑽同禮喪大記君殯用輶輶注輶乘柩之車輶猶鼓也尸子所謂撮卽禮之輶

連

文選子虛賦微矰出嫲繳施弋白鵠連駕鵝李善云言旣弋白鵠而因連駕鵝也案善意以爲連及非是淮南覽冥訓蒲且子連鳥於百仞之上高誘云蒲且子楚人善弋射者馥謂連以嫲繳牽連之也

駮駮

甘泉賦崇上陵之駮駮兮李善注駮駮高大貌也案說

文駢駢駢也駢馬搖頭也我頃頓也頗頭偏也馥謂駢
駢言上陵偏頗之狀

縈紆

李善注西都賦引說文紆縈也又云縈紆猶回曲也馥
案賦中紆字當作迂說文迂避也避回也李注望文爲
義不爲破字失之

貸

急就篇貰貸賣買販肆便顏注貸假與也馥謂貸當爲
資說文資從人求物也貸施也貰貸連文與施義遠今
說文貰下云貸也貸亦當爲資

不內顧

張平子東京賦夫君人者黷纘塞耳車中不內顧薛綜注云內顧謂不外視臣下之私也李善注云魯論語曰車中不內顧崔駰車左銘曰正位授綬車中不顧馥案論語釋文云魯讀車中內顧魯讀卽魯論語然則張賦李注本無不字後人據今本論語加之薛注尤爲明顯車左銘亦是車中內顧藝文類聚俗本改不字其車右銘云內顧自救知左銘亦是內顧

李善西京賦注引三略曰將內顧則士卒慕之也

索

西京賦交綺豁以疏寮薛綜注疏刻穿之也靈光殿賦
天窗綺疏張載注疏刻鏤也景福殿賦編以綵疏李善
云綵疏謂繪五彩於刻鏤之中馥案說文阨門戶疏窗
也寮穿也

薛注竄窳類貍虎亦食人馥謂亦當爲爪釋獸貍
貍類貍虎爪食人

夔魑

東京賦殘夔魑與罔象薛綜注夔木石之怪如龍有角
說文曰魑耗鬼也馥案說文夔神魑也夔魑是一物賦
下文野仲游光皆一物名夔魑不得爲二此沿孟康揚

雄傳注之誤

藉田賦

潘安仁藉田賦晉書本傳思樂旬畿薄采其芳大君戾止言藉其農案芳農聲不相近文選作茅是也束皙勸農賦惟百里之置吏各區別而異曹考治民之踐職美莫富乎勸農可爲比照文選垂髻總髮與戾襪二韻不合本傳作總髻是也

集韻變惜俱屬冬部猥懷懷俱屬豪部

百草含葩

李善注琴賦云思元賦曰天地煙煴百草含葩鳴鶴交

頸雉鳩相和以韻推之所以不惑案後漢書張衡傳作
百草含藹藹古音與和爲韻

熙春

閒居賦熙春寒往李善引廣雅熙熾也馥案熙正作嬰
說文嬰說樂也老子萬物熙熙如登春臺如享太牢亦
借熙字

鄆亭

郡國志琅邪國東垣有鄆亭劉昭注引左傳公處鄆馥
案魯有東鄆西鄆在東垣者爲東鄆趙孟所謂莒魯爭
鄆是也公所處之鄆在廩丘縣東左傳昭公至自乾侯

居於鄆成公待於鄆是也此乃西鄆與鄆亭無涉劉注誤矣

京相璠曰琅邪姑幕縣南員亭故魯鄆邑世變其字非也

翰

釋名觀翰也望之延頸翰翰也案翰當爲翰說文看或作翰睠也睠望也

劉擔

漢書百官表千鐘侯劉擔史記作劉搖案擔當爲擔天文志星擔者民勞也

骨母

七發厲骨母之場李善注引胥母山疑骨字之誤案隸書胥作骨與骨形近此致誤之由晉書捐次又譌作捐次亦因骨曷形近

滿

四子講德論傳曰詩人感而後思思而後積積而後滿滿而後作李善云樂動聲儀文也馥謂兩滿字竝當作慙下文云是以刺史感慙舒音而詠至德故知作滿者字之誤也慙謂憤慙史遷云詩三百五篇大抵忠臣孝子發憤之所爲作也

貢

幽通賦周賈盪而貢憤兮曹大家曰貢潰也憤亂也潰
亂於善惡案貢憤當爲憤憤廣韻憤憤也集韻憤悵憤
兒說文憤亂也又廣雅慎憤也慎當爲憤旣質之王給
諫說與余異

附王給諫答書

承示廣雅慎憤也慎爲憤之誤文選幽通賦周賈盪
而貢憤兮憤亦爲憤之誤念孫案憤有潰亂之義曹
大家訓憤爲潰是也亦有恐懼之義廣雅訓忒慎爲
憤是也欲知廣雅憤字之義當於忒慎二字求之說

文弋惕也春秋國語曰于其心弋然鄭注易云惕懼也是弋爲恐懼之義廣雅慎恐也是慎亦有恐懼之義方言蛩悞戰慄也荆吳曰蛩悞蛩悞又恐也廣雅魑蛩悞畏恐懼也魑慎忌畏恐也弋慎憤也轉相訓釋而其義自明憤恐蛩悞聲近而義同也若改憤爲憤則與弋字之義不類廣韻弋意慎弋也此尤足證慎字之不誤又案憤字亦有潰亂之義是以慶鄭言亂氣狡憤是以曹大家孟康皆訓憤爲亂字通作賁荀子彊國篇下比周賁潰以離上韓詩外傳作憤是憤與潰同義說文憤懣也懣煩也煩亦亂也李奇注

漢書敘傳云愼懣也是愼與愼亦同義似無煩改愼爲愼也肅此覆俟裁酌不宣念孫頓首

水南曰陽

江賦浮磬肆乎陰濱五臣注云生北岸故云陰濱水南曰陽馥案此後人妄改非本文也穀梁傳水北爲陽詩在洽之陽五臣豈不熟聞未應荒陋至此說文陰字云水之南山之北也此亦註家習知者

朱書

宋書列傳第十九卷有張暢傳第六卷張邵傳後又有暢傳事雖同而文簡且無史臣論又稱魏爲魏主與前

傳稱虜文異此定非沈氏原文案目錄趙倫之傳後有到彥之傳今彥之傳闕當是後人竄入張暢傳也張邵傳中已附其子敷傳第二十二卷又特立張敷傳此則史家謬亂不容他委

鐵戈斬山

吳志賀齊傳黥賊陳僕等屯林歷山山四面壁立數十丈齊募輕捷士爲作鐵戈密於隱險賊所不備處以戈拓斬山爲緣道夜令潛上案二戈字當爲弋弋槩也可賴以陟險鐵弋用以開掘也斬山當合爲斬字謂以鐵弋開拓斬削修成緣道也

巾車

陶公歸去來辭或命巾車案江文通擬陶田居詩日暮巾柴車李善注云歸去來曰或巾柴車鄭元周禮注曰巾猶衣也是李善本原作或巾柴車後人改之張景陽七命爾乃巾雲軒與巾柴車同

周禮巾車劉昌宗讀去聲居焮切俗作抽廣韻抽覆巾名集韻抽巾覆物也

形天

陶公讀山海經詩形天舞干戚案海外西經形天與帝至此爭神帝斷其首葬之常羊之山乃以乳爲目以臍

爲口操干戚以舞淮南地形訓西方有形殘之尸高注云形殘之尸於是以乳爲目以膾爲口操干戚以舞馥謂形天當作形夭唐等慈寺碑作形夭蓋形天卽形殘也

散宜生

散宜生說者謂散氏宜生名案大戴禮帝系篇堯娶于散宜氏之女謂之女皇漢書人表女皇堯妃散宜氏女據此則散宜複姓

越鄂君

李義山詩繡被猶堆越鄂君案說苑鄂君子皙泛舟於

新波之中榜桡越人擁楫而歌鄂君子皙曰吾不知越歌子試爲我楚說之於是召越譯楚說之鄂君子皙乃揄修袂行而擁之舉繡被而覆之鄂君子皙楚王母弟也官爲令尹爵爲執珪一榜桡越人猶得交懽盡意焉據此則越鄂君誤矣當作楚鄂君

飾巾

後漢書陳寔傳寔久絕人事飾巾待終而已案飾巾當爲帥續漢書何進袁隗欲特表陳寔以不次之位寔謝曰久絕人事帥巾待終而已說文帥佩巾也

嗜噫

史記淮陰侯傳項王喑噁叱咤千人皆廢案喑當爲喑
喑大聲也信陵君傳晉鄙嘆喑宿將正義引聲類嘆大
笑喑大呼

沙音蔡

水經注渠水下云沙水音蔡馥案蔡當爲察說文譚長
說沙或從止止子結切察止聲相近周易釋文云沙鄭
作汙汙卽汙之譌

鴛

呂氏春秋三月紀田鼠化爲鴛高注鴛鵲青州謂之鴛
鵲周雒謂之鴛幽州謂之鵲也馥案鵲當爲鵲鵲當

爲鵠鵠釋鳥鵠駕母郭注鵠也青州人呼鵠母

蝠蛇

後漢書崔琦傳蝠蛇其心注以蝠爲蝙蝠馥謂蝠蛇卽
蝮蛇借蝠字

肆

淮南齊俗訓譬若舟車楯肆窮廬故有所宜也高注水
宜舟陸宜車沙地宜肆泥地宜楯草地宜窮廬文子自
然篇水用舟沙用肆泥用楯山用櫟釋音云肆乃鳥切
推板具馥謂肆當爲肆之譌呂氏春秋慎勢篇作沙用
鳩尸子作行沙以軌

彼

玉篇彼邪也廣韻引論語子西彼哉馥案詩彼交匪敖
左傳作匪交匪敖詩彼交匪紆荀子勸學篇作匪交匪
紆左傳引詩如匪行邁謀杜注匪彼也馥謂彼竝當作
彼彼匪通者匪亦邪也易所謂匪寇是也集韻引埤蒼
與玉篇同

蕩

廣韻蕩徒朗切大也又水名出湯陰蕩吐郎切水名在
鄴今蕩陰縣單作湯馥案說文蕩水出河內蕩陰東入
黃澤从水蕩聲徒朗切蕩大竹也從竹湯聲徒朗切廣

韻竝以爲水名謬甚張遷爲蕩陰令其碑從艸

李善引書

李善所引蒼頡篇三蒼聲類字林諸書多依隨文選俗字非本書原文如引說文仿佛作髣髴輒作輔隤作頽玃樂作的礫此類不可悉舉或據爲本書左證則因誤而誤矣

卉

上林賦卉然興道而遷義郭璞曰卉猶勃也馥謂當作𦵏說文𦵏艸木𦵏李之兒

認

洞簫賦憤伊鬱而酷酖李善引蒼頡篇酖憂貌奴谷切
案五臣本作酖玉篇酖音溺愁面也無酖字賦又云時
恬淡以綏肆李善云綏遲也王肅尚書注曰肆綏也馥
案綏當爲緩字之誤也五臣云綏安也非是舜典青災
肆赦傳云肆緩也過而有害當緩赦之莊二十二年老
傳肆大眚疏云肆緩也李善云廣雅曰恬靜也說文曰
恬安也汲古閣本六臣本俱誤作說文曰淡安也賦又
云或雜還以聚斂兮或拔擢以奮棄五臣釋奮爲奮迅
馥案拔擢分散也奮棄當爲棄蕪棄說文棄蕪棄除也
賦又云佚豫以沸渭李善本作怫惛注引埤蒼怫惛不

安貌案玉篇廣韻作怫惛竝與卑蒼訓同汲古閣刻李
善本作沸渭後人亂之也六臣本云渭善本作惛又笙
賦中怫鬱以怫惛李善五臣二本竝從立心賦又云時
橫潰以陽遂李善引禮記注遂達也馥謂遂當爲隊樂
記上如抗下如隊

慆亮

笙賦勃慷慨以慆亮李善云慆亮聲清也聲類云慆且
也案慆且義遠當爲謬說文謬清深也

諝

金石錄金鄉長薛石頌君諱諝字公謀諝宋本作諝案

陸機辨亡論謀無遺謂淮南本經訓設詐謂高誘注謂謀也

庸峭

宋人小說魏收有庸峭難爲之語文潞公以問蘇子容子容曰向聞之朱元憲云事具本經蓋梁上小柱有曲折峻峭之勢言人之儀矩可喜者曰庸峭馥案此溫子昇語也子昇自以不修容止謂人曰詩章易作逋峭難爲庸逋二字竝非此義當爲峭峭廣韻峭峭好形兒出字林今猶謂自猗容儀者爲賣峭

僱工

玉篇雇今以爲雇僦字唯備也馥案今俗作僱工矣後漢書光武紀女徒雇山歸家注引漢書音義令甲女子犯徒遣歸家每月出錢雇人於山伐木名曰雇山

慤素

文選舞賦懷慤素之潔清李善引說文慤貞也馥案慤當爲設說文設素也又樸木素也設素謂樸素

究

西京雜記許博昌安陵人也善陸博法用六箸或謂之究以竹爲之長六分案究當爲煢顏氏家訓古者大博則六箸小博則六煢又作瓊鮑宏博經用十二碁六碁

白六棊黑所擲投謂之瓊史記蔡澤傳君獨不觀夫博者乎或欲大投或欲分功集解云投投瓊也索隱云言夫博弈或欲大投其瓊以致勝是也

虞猛獸

漢書賈山傳縣石鑄鐘虞顏注虞猛獸之名謂鐘鼓之柎飾爲此獸後漢書董卓傳又壞五銖錢更鑄小錢悉取洛陽及長安銅人鐘虞飛廉銅馬之屬以充鑄焉注云鐘虞以銅爲之故賈山上書云縣石鑄鐘虞前書音義曰虞鹿頭龍身神獸也馥案虞非獸名當爲虞說文虞或從金虞聲司馬相如說虞封豕之屬一曰虎兩足

舉蓋漢書本作鐘鐻故顏注及音義並以虞爲獸寫者
改爲鐘虞又改虞爲虞失之

操弓

家語子路初見篇操弓不反檠操當爲燥說苑燥弓不
返於檠

跼

今以官路置驛馬爲跼案當作棧莊子我善治馬編之
以皂棧司馬彪曰棧若櫟牀施之溼地也赭白馬賦斃
於內棧李善曰棧櫪也五臣曰棧以板禦溼而承馬足
也千寶晉書駑馬戀棧豆通俗文板閣曰棧通鑑郭子

儀園鄴城壅漳水灌之城中井泉皆溢構棧而居

陶遂

後漢書杜篤傳粳稻陶遂注引韓詩陶暢也馥案禮記祭義陶陶遂遂如將復入然鄭注陶陶遂遂相隨行之貌

駮

玉篇駮雷繫鼓也馥案當云擊雷鼓也西京賦駮雷鼓夏官大司馬鼓皆駮王粲英雄記整兵駮鼓

梅

方言梅貪也廣雅同楚辭天問穆王巧梅夫何爲周流

王逸注梅貪也馥案梅當爲梅廣韻梅貪也

僭時

漢書敘傳侯伯僭時應劭曰秦文公造西時祭天是也
馥案文公當爲襄公封禪書襄公作西時文公作鄜時

鐵鈇

急就篇鐵鈇鑽錐釜鍍釜顏注鐵鈇以鐵爲莖刃也案
鑽錐鍍釜釜皆鐵器不應專屬鈇馥謂鐵當爲鐵廣雅
鐵銳也亦錐類

鐵幕

韓策甲盾鞬釜鐵幕鮑注鐵幕以鐵爲臂脰之衣史記

蘇秦傳當戰則斬堅甲鐵幕馥案幕謂以鎧覆於衣外也釋名畱幕冀州所名大褶至郝者也畱牢也幕絡也言牢絡在衣表也

獸

周易中孚卦釋文云畜本或作獸馥案獸當爲豨匡謬正俗謂豨卽六畜字今周易注疏本作獸因豨誤也

誅

廣雅殺也廣韻殺與列同陟輸切注云列殺字從反馥案此言列與說文從肖之削異也經典以誅爲殺說文誅討也廣韻誅責也無殺意經典假借誅字也當作

列或作戕說文形似之字多爲人削除故刀部有削無列廣韻定非無據

牂牁

廣韻歌部牁所以繫舟戕陸云上同唐部戕牁亦作牂案陸云者或陸法言切韻或陸該字林不可臆知蓋陸以戕與牂同脩廣韻者誤與牁同也戕當爲戕玉篇弋部戕子耶切繫船大弋也又牂牁郡亦作牂又𠵿各何切𠵿𠵿卽牂牁也

牂模

廣韻牂牁模模當爲橫集韻牂牁橫枕篇海牂音光牂

橫木也案牖牀版也牖牖之橫者也

餽飮句豆

餽飮當爲逗訂字林訂逗遛也句豆長笛賦作句投杜
子美詩遠投錦江波一本作逗

粟秒

說苑度量衡以粟生之數十粟爲一分十分爲一寸十
寸爲一尺說文律數十二秒而當一分十分而寸其以
爲重十二粟爲一分十二分爲一銖案十粟何止一分
說苑有脫誤疑作十秒說文十二秒亦應作十秒因下
十二粟致誤

采稻

埤蒼稽自生也通鑑注稻與稽同禾不布種而自生曰
稻晉書郭舒傳采稻湖澤以自給夏統傳每采稻求食
桓元傳會稽飢荒百姓散在江湖采稻通鑑慕容詳不
聽民出采稻唐書馬燧傳歲大旱田蕝不及耕是秋稻
生於境人賴以濟嚴震傳梁漢閒刀耕火耨民采稻爲
食北史宋世良傳獄內稽生桃樹字或作旅語林劉道
真於河側見一老姬采旅梁書武帝紀北徐州境內旅
生稻稗二千許頃庾沙彌傳墓在新林因有旅松百餘
株自生毛刻三國志凡稻字皆誤从木梁書王僧辨傳

其夜軍人采稻失火亦誤从木

笏

廣雅榜擊也音彭通鑑光武謂第五倫曰聞卿爲吏笏婦公注云笏音彭後漢書陳寵上疏斷獄者急於笏格酷烈之痛章懷注笏卽榜也古字通用聲類曰笞也說文曰格擊也案說文格擊也兩格字皆誤從木笏音彭卽彭排之彭

陽稍

通鑑祖珽使人簿錄斛律光家得陽稍二注云明非私藏兵器馥謂兵刃有陰陽陽者露出陰者潛縮此稱稍

之陽刃者也

藍衫

學官弟子服藍袍呼爲藍衫此誤也當爲襴衫唐制士人以棠苧襴衫爲上服馬周議禮無服衫之文三代有深衣請加襴袖標襪長孫无忌議服袍者下加襴緋紫皆視其品馥謂今秀才袍加青邊是其遺製

櫺星門

龍魚河圖云天鎮星主得土之慶其精下爲靈星之神案學官孔子廟前有櫺星門蓋取得土之義古字靈櫺通莊子釋文云編木作靈似牀曰棧後人以漢祠靈星

祈穀與孔廟無涉又見門形如窗櫺遂改靈爲櫺春秋
說題辭曰槐木者靈星之精益知靈星改爲櫺星矣
今之屍牀呼爲靈牀本作櫺管寧坐櫺牀上司馬彪
莊子注棧若櫺牀定九年左傳載蔥靈正義云賈逵
云蔥靈衣車有蔥有靈然則此車兩旁開蔥蔥中豎
木謂之靈今人猶謂編豎木爲櫺子

區

莊子釋文卻曲字書作迟廣雅云迟曲也集韻作區物
曲也一曰曲受也馥案匚傳寫之誤當從匚曲字古文
作匚此變爲匚也

毛詩拾遺

太平御覽所引毛詩拾遺皆謂出於郭璞案北史高允作也

集韻脫芍字

集韻緝下云說文芟也謂茅根一曰藕梢案此乃芍字訓漏脫芍字誤屬緝下又失緝之本訓也廣韻芍藕根小者

巾卷

余題齋額曰巾卷蓋取顏延年詩巾卷充街也見者多依李善解爲巾箱書卷惟袁簡齋先生知是頭巾爲作

跋尾欲舉解巾二事而忘其人名案後漢韋彪傳解巾之郡北史高柔傳解巾司空行參軍是也南齊書王儉傳監試諸生巾卷在庭劍衛令史儀容甚盛顏延年秋胡詩脫巾千里外結綬登王畿李善注云巾處士所服綬仕者所佩今欲宦於陳故脫巾而結綬也通鑑宋文帝令雷次宗以巾構侍講胡三省引蜀注巾謂巾幘

胛

一切經音義引說文胛肩甲也玉篇胛背胛也後漢書張宗傳襲赤眉中矛貫胛注云胛背上兩膊間通鑑齊宣城王胛上有赤誌注云肩背之間爲胛南齊王與傳

頸下有傷肩胛烏黥梁書狼牙脩國其俗男女皆袒王
及貴臣乃加雲霞布覆胛案戴逵及子頤善造佛像宋
世子鑄銅佛像面恨瘦頤曰非面瘦乃臂胛肥耳水經
注赤岬山土人云如人袒胛故謂之赤岬山韓偓詩酥
凝背胛玉搓肩楊萬里詩笠是兜鍪蓑是甲雨從頭上
溼到胛釋名肩堅也甲闔也與胛脅皆相會闔也通鑑
骨利幹於鐵勒諸部爲最遠晝長夜短日沒後天色正
曛煮羊脾適熟日已復出矣馥案史載云海東有國曰
骨利幹地近扶桑國人初夜煮羊脾方熟而日已出歐
陽永叔謝人寄牡丹詩邇來不覺三十載歲月纔如熟

牟腓用以爲韻通鑑脾譌字也

秦

說文秦伯益之後所封國地宜禾一曰秦禾名案禾名當爲木名字之誤也文選風賦離秦衡李善云秦木名范子計然曰秦衡出於隴西天水馥案說文榛木名蓋榛通作秦也

唐

漢書揚雄傳故甘露零其庭醴泉流其唐應劭引爾雅廟中路謂之唐馥案應說非是當讀如周語陂唐汙庫之唐謂醴泉出而成池唐也靈光殿賦玄醴騰湧於陰

溝甘露被宇而下臻景福殿賦醴泉涌於池圃蓋甘露
下零故被於階庭醴泉上涌故流於池唐

嶼

謝靈運詩孤嶼媚中州郭璞江賦石帆蒙龍以蓋嶼五
臣注洲中山曰嶼劉逵注吳都賦石帆生海嶼石上相
鶴經行必依洲嶼馥案嶼俗作也當爲淤上林賦行乎
洲淤之浦李善注引方言水中可居者曰洲三輔謂之
淤也

馱

江賦鴈鷺馱李善本作馱引山海經馱其狀如鳬郭

璞音鉗鉗之鉗五臣本作馱音步末切或以馱與下文
月聒翹沫豁碣爲韻五臣音近是玉篇馱大鳥也廣韻
鳩鳥名似鳬此二書皆宋人重修之謬案牽汙竝從大聲音他達切
馱從大亦與下文合韻也郭音不謬字當爲馱

蹠

江賦夔犭翹蹠於夕陽李善引莊子鼈草飲水翹尾而
蹠此馬之真性也五臣注蹠音六廣韻蹠力竹切翹蹠
也馱案說文蹠曲脰也讀若達是蹠卽蹠之變體謂馬
曲一脰也

莊子釋文作陸引司馬云陸跳也據李善所引當作

陸

糠梁

長門賦施瑰木之構榼兮姿參差以糠梁李善注言以瑰奇之木以爲構榼委積參差以承虛梁馥案說文康屋康寘也康寘高空之義賦借糠梁字不得解作屋梁止衎

山海經北山經鷖鳥可以止衎郭注治洞下也馥案中
山經飛魚已痔衎然則止衎亦謂能止痔衎

裹節

木工謂樹節爲裹節案說文卮科卮木節也賈侍中說

以爲厄褻也厄音五果切

攬

說文攬徐鉉音匹齊切案文選琴賦觸攬如志李善注
攬蒲結切玉篇蒲結普雞二切廣韻蒲結切無普雞一
音曹憲有文選音李善受學於憲其音當出於憲大徐
音學不如曹李遠矣廣韻不收普雞一音良是

袞

說文袞從衣公聲此誤也當從𠂔說文𠂔讀若沅州之
沅沅隸作充魏受禪碑襲袞龍其字從充省不從公故
知當從𠂔

俗書變台爲公船鉛從台今作舩鉛與衮作衮同

觸龍言

史記趙世家觸龍言願見太后案龍言乃誓字誤分爲二趙策有觸誓

齋速

楚辭九歌吾與君兮齋速注訓齋戒案離騷反信讒而齋怒注云齋疾也馥謂齋速亦疾也

府腫

呂氏春秋先已篇身盡府腫高注府腹疾也又盡數篇處腹則爲張爲府高注府跳動皆腹疾馥案府當爲疔

玉篇引作疔說文疔小腹病

瘵耗

急就篇薦瘵瘵瘵迎醫匠顏注瘵損耗也說文瘵減也
一曰耗也一切經音義衰毫字體作瘵同所龜反禮記
年五十始瘵瘵懈也古文毫毫二形今作耗同莫報反
馥案當云毫古文毫毫二形毫俗作耗薦瘵瘵瘵皆老
病顏謂損耗失之

女帆山

廣韻帆下云女帆山名弱水所出案弱水所出之山單
名帆說文帆下云山也或曰弱水之所出此卽楚詞之

窮石十六國春秋謂之蘭門山在漢張掖刪丹西南女
岬別是一山九域志女岬山在河南府壽安縣神仙傳
葛仙翁於女几山學仙是也

杜探

說文敘漢興有草書注引徐鍇曰齊相杜探作案鍇本
作杜操趙宦光長箋同陳君煊曰操字伯度始作草書
周興嗣千字文所稱杜橐是也避魏武帝諱改稱杜度
韓退之諱辨云漢之時有杜度卽其人也

乖居

淮南泰族訓關雎興於鳥而君子美之者爲其雌雄之

不乖居也案乖當爲乘列女傳睢鳩之鳥猶未嘗見其
乘居而匹游

鳥喙

小爾雅廣器衡扼也扼上者謂之鳥喙案喙當爲啄釋
名鳥啄向下义馬頸似鳥開口向下啄物時也

楫柎

高注淮南云駟推也讀若楫柎之柎案當云讀若拊
之拊說文拊推擣也駟反推車令有所付也讀若拊

字母

隋書經籍志自後漢佛法行於中國又得西域書能以

十四字貫一切音文省而義廣謂之婆羅門書案十四字當作四十字謂華嚴字母四十字也然則字母自後漢已入中國至魏始大傳於世

掌技

文選薦禰衡表激楚陽阿至妙之容掌技者之所貪呂向注云主技樂之人所以貪愛案下文云飛兔騖絕足奔放良樂之所急也王良伯樂兩人則掌技亦當爲二後漢書禰衡傳作臺牧注云未詳孔融集作堂牧

癯衰

漢書禮樂志是故纖微癯瘁之音作注云瘁一作衰

案瘁當爲瘥說文瘥減也故樂記作嘒殺殺亦減也瘥
嘒皆借字當爲漹漹盡也

摻

後漢禰衡傳衡方爲漁陽參搥章懷注云參搥是擊鼓
之法而王僧孺詩云散度廣陵音參寫漁陽曲自音云
參七紺反讀參字音爲去聲不知何所憑也楊氏談苑
徐錯仕江左領集賢學士校祕書時吳淑爲校理古樂
府中有摻字者淑多改爲操蓋章草之變錯曰非可一
例若漁陽摻者音七監反三搥鼓也禰衡作漁陽摻搥
古歌詞云邊城晏聞漁陽摻黃塵蕭蕭白日暗淑歎服

天中馥案庾信詩聲煩廣陵散杵急漁陽摻李願詩忽
記同然更作漁陽摻黃雲蕭條白日暗李商隱詩欲問漁陽
摻時無禰正平又云必投潘岳果誰摻禰衡摻蘇軾詩
幅巾起作鴈鵠舞疊鼓誰摻漁陽摻宋祁詩波生客浦
揚舲遠潤通漁陽摻參遶又云征聲曲曲漁陽摻後乘
人人鄴下才廣韻參七紺切參鼓馥謂本作參俗加手
旁

羈

馬鞍具曰羈此俗作也當爲幪廣韻幪蘇旱切二幅說
文幪婦人脅衣馥謂幪亦馬之脅衣故冒名焉晉書張

方傳軍人入宮閣爭割流蘇武帳而爲馬棧

釋文引字林

爾雅釋文引字林蠡大鼃似狷案此有脫誤當爲以胃
鳴

魚泣津

續漢郡國志犍爲郡南安有魚泣津范書吳漢傳漢與
公孫述將戰於魚涪津案泣涪皆誤當作陪說文鮓魚
陪牆也出蜀中

襠

阮籍大人先生傳動不敢出禪襠案襠本作當遮也遮

前後也上古有韎但知蔽前不知蔽後故復作褱而加當其上

兩褱亦應作當前當心後當背也

練

晉書王導傳庫中惟有練數千端鬻之不售導乃制練布單衣士人競服之隋書姚察傳門生送南布花練類篇引後漢書禰衡傳作練巾今本誤作疎巾

齠騎

管子輕重戊篇車轂齠騎連伍而行注云齠齠也言其車轂往來相齠案說文齠齠也齠齠也注與齠義合但

舊騎未安說文又云齧一曰馬口中槩也齧騎言馬連
伍受槩司馬相如諫獵書云猶時有銜槩之變張揖曰
槩駢馬口長銜也

憂艱

今以父母卒稱丁憂丁艱若移於兄弟夫妻世多非笑
案漢人有遭兄弟憂去官者潘安仁楊仲武誄云德官
之艱此謂其妻楊肇女卒於洛陽德官里也

區種

汜勝之書上農區田大區方深各六寸相去七寸一畝
三千七百區丁男女治十畝至秋收區三升粟畝得百

斛也李善引此文云區音鄔侯切馥案廣雅圃劂劂也
廣韻圃烏侯反圃劂又恪侯切劂裏也馥謂區當作圃
謂劂地作方坎以下種使容糞且耐旱與隴田耨種迥
異

種瓜皆劂坎又先於秋日取新刈高糧稈浸沔池中
種時尺斷其稈深插坎之四隅最耐旱

王姓

廣韻王姓二十一望以北海陳畱爲齊王田和之後案
惟北海一望爲田和後王莽傳齊人謂之王家是也陳
畱則畢萬之後曹子建王仲宣誄猗歟侍中遠祖彌芳

公高建業佐武伐商流裔畢萬勲績惟光晉獻賜封於
魏之疆天開之祚末胄稱王李善云陳畱風俗記浚儀
縣魏之都也晉獻公以魏封大夫畢萬後世文侯初盛
至子孫稱王是爲惠王然以稱王因氏焉案廣韻又以
高平京兆爲魏信陵君之後

辟姓

廣韻辟姓也漢有辟子方黃小松司馬拓示北魏造像
題名有辟姓始知辟當爲辟俗趨約易省艸耳

口占

文選曹子建與吳季重書適對嘉賓口授不悉五臣注

對客口授使者而制此書案陳遵常召善書吏於前治私書謝親故焉凡口占子建亦授吏代書卽書中所謂意事小吏非授使者也

媼藥

集韻媼詆媼漢書媼藥其短案司馬遷傳作媒藥孟康解爲酒媒麴藥是也作媼則藥字無著漢書枚皋作賦詆媼東方朔詆媼媒藥兩義集韻誤合爲一

齊人名麴麴曰媒徐邈讀麴爲去穢反廣韻梅酒母高樯

北方伎人足繫木竿上跳舞作八仙狀俗呼高樯案列

子說符篇有異伎張注云僑人又山海經長股國郭注云今伎家僑人像此馥案說文僑高也當言高僑左傳長狄僑如僑如者高如也

櫛

廣韻櫛樹木立也案櫛當爲菑考工記輪人察其菑蚤不齟鄭司農云菑讀如雜廁之廁謂建輻也泰山平原所樹立物爲菑聲如哉博立梟基亦爲菑

灘脩

淮南天文訓太陰在申歲名曰涪灘高注涪大灘脩萬物皆脩其精氣馥案兩脩字寫誤竝當爲循高注呂氏

春秋序意篇歲在涪灘云涪大也灘循也萬物皆大循其情性也李巡說爾雅云萬物皆循精氣故曰涪灘

𩚑𩚑

關東謂甑爲𩚑梁州謂釜曰𩚑堯舜飯土𩚑皆不典之文俗因𩚑而改作之

𩚑

襄九年左傳備水器注云盆𩚑之屬玉篇𩚑大盆也續漢書盜伏於𩚑下案𩚑𩚑皆俗作也當爲鑑周禮凌人春始治鑑注云鑑如甄大口以盛冰說文鑑大盆也

鍾

毛氏增韻鍾下引說文當也又酒器又量名徐鉉本無當也量名二義徐鉉說文韻譜鍾當也又酒器亦量名案韻譜非錯原本乃其兄據李舟切韻增訂者廣韻鍾當也酒器也又量名與李舟切韻同毛氏不知出切韻以爲說文疏矣洪武正韻又沿其誤

苻

瀛奎律髓有宋子京春宴行樂園詩云園苻初乾小雨泥注云苻人去聲是讀認矣廣韻證部認苻同紐認音而證切又而振切謂認又屬震部非謂苻亦而切也讀人去聲者或因認字致誤

辣虎

湖州茱萸醬謂之辣虎集韻茱搗茱萸爲之味辛而苦
馥謂虎乃茱音之譌

黏蟬

張船山同年云高麗人言漢黏蟬縣蟬讀如提新城王
尙書詩何以押入先韻馥案服虔應劭本音提廣韻齊
部有磳鷗二字皆從單聲而不收蟬字此韻家之疏也
集韻蟬田黎切黏蟬縣名在樂浪可補廣韻之闕

顏子驕

史記孔子弟子顏高字子驕索隱引家語又名產案鄭

子產名僑是子驕當爲子僑僑高也

陸德明

陸氏經典釋文敘云粵以癸卯之歲承乏上庠余友丁小雅謂癸卯爲陳後主至德元年隋文帝之開皇三年馥案隋書許善心傳大業元年轉禮部侍郎奏薦儒者徐文遠爲國子博士包愷陸德明褚徽魯世達之輩竝加品秩授爲學官考大業元年爲乙丑去開皇癸卯已二十五年新唐書本傳云陳太建中後主爲太子集名儒入講承光殿德明始冠與下坐解褐始興國左常侍陳亾歸鄉閭隋煬帝擢祕書學士大業間廣召經明士

於是德明與魯達孔褒共會門下省遷國子助教據此則陳後主時僅爲常侍不得言上庠也與魯達共會門下省卽善心所薦也國子助教卽授爲學官也皆與癸卯不合或以癸卯爲貞觀十七年案本傳又云秦王辟爲文學館學士補太學博士高祖已薨眞召博士徐文遠講經德明徧析其要遷國子博士案高祖時已遷國子博士不待貞觀癸卯始承之上庠也及檢舊唐書云高祖善之賜帛五十匹貞觀初拜國子博士然後知國子博士太宗所授非高祖所遷新唐書刪易舊文遂不明了敘所稱實貞觀之癸卯也德明已爲唐臣不應於

陳隋往代而曰承乏曰上庠其稱本朝近事無疑此文
立言之體也

札樸第七

山陰 李信 校正